

## REGIONAL NEWS

HEADLINES:-

1. November ni 5 a Sinlung Hills Council inthlan tura chuh tum mi 50 te'n endikna an paltlang.
2. Presbytery Inkhawmpui-ah nimin atanga rorel tan chu vawiin khan chhunzawm a ni.
3. Prime Minister Internship Scheme 2024 chu vawiin tlai dar 5 khan a duh apiang dil theih turin hawn a ni.
4. BJP kaihhruai, Haryana sorkar thar chu tun thla ni 17-ah lak luh a ni dawn.

&lt;&gt;&lt;&gt;&lt;&gt;

SHC SCRUTINY

November ni 5 a Sinlung Hills Council inthlan vawi 2-na lo awm tura chuh tum mi 50 te'n endikna an paltlang.

Sinlung Hills Council-a bial 12 inthlanna awm tur chuh tumin mi 50-in an hming an pelut a. Nimin khan an hming pekluchte hi endik a ni a. Hming pete zawng zawng hian endikna an paltlang vek a, Thawhtanni chawhnu dar 3 thleng inhnudawhna hun siam a ni. He inthlan lo awm turah hian rorellai ZPM leh Hmar People's Convention (HPC) chuan bial awm zawng zawng hi an chuh dawn a. An inremsiam danah chuan ZPM-in bial 8 an chuh ang a, HPC-in bial 4 an chuh ang. Congress pawhin bial zawng zawng an chuh a dawn a, MNF chuan HPC (Reformed) nen thawk hovin bial 12 an chuh ang. Hetih lai hian MNF leh Congress party hminga chuh tum hming pelut zingah independent anga chuh an awm bawk a. BJP-in bial 2, Khawlian leh Phuaibuang an chuh dawn a, a dang zawng chu independent a chuh an ni.

Sinlung Hills Council bial 12 zinga bial 6 hi Aizawl district huam chhunga awm a ni a, bial 4 chu Saitual district-ah awmin Kolasib district-ah bial 2 a awm bawk. Khawlian, Tinghmun leh Saipum bialah te candidate 6 an awm a, Phuaibuang bialah candidate 5 an awm a. Suangpuilawn, New Vervek leh Saiphai bialah candidate 4 theuh awmin bial dang - Vanbawng, Ratu, Sakawrdai South, Sakawrdai North leh Zohmun bialah te chuan kil thumin an inchuh dawn a ni.

Inthlanna lo awm turah hian vote nei mi 23,794 an awm a. Vote nei zinga 11,875 hi mipa an ni a, hmeichhe vote nei 11,914 an awm bawk a ni. Sinlung Hills Council hi July ni 5, 2018 atanga hman tan Sinlung Hills Council Act, 2018 dan tlawhchhana din a ni a. November ni 5, 2019 khan inthlanna hmasa ber buatsaih a ni.

&lt;&gt;&lt;&gt;&lt;&gt;

## STIR

Mizoram Commercial Vehicle Union (MCVU)-in karleh Thawhtanni atanga sumdawng lirthei zawng zawng dintir an tum an thulh rih lain kawngpui chhe lutuk avanga tlan tum lo pawl 3 an awm.

MCVU hian chief minister Pu Lalduhoma an hmuh hnu-ah kar leh Nilaini a cabinet thukhawmin petrol leh diesel man sang tihhniam leh chungchang an ngaihtuah nawn leh dawn avang leh tihhniam ngei tura an ngaih avangin Thawhtanni atanga sumdawng lirthei zawng zawng tlan lo tura thutlukna a siam chu an sut lailawk a. Hetih lai hian Mizoram Truck Driver Association (MTDA), Mizoram tipper neitu leh khalhtu pawl leh eirawngbawlna gas phurtu Mizoram Indane Driver Welfare chuan lirthei din tir an lo tum tawh chu kaltlangpui an tum thu an puang. Hetianga nawrh an tum tlang chhan hi Aizawl leh Silchar inkar kawngpui dunga Sairang leh Durlui inkar kawng chhe zual pui, lirthei tluk hlauhawm khawpa khwar chhe laite siamthat a nih hma chuan Thawhtanni atangin tlan rih loh ni se an ti a ni.

Lirthei khalhtu pawl pathumte hian thuchhuah siamin tun thla ni 5 khan Sairang leh Durlui inkar kawng chhia hi October ni 9 hma a siamtha turin a siam hna thawktu NHIDCL hnuai a contractor-te a hrilh niin an sawi a. October ni 9, Nilaini khan a hmunah an zuk en a, hmasawna duhthusam hmuh tur a awm chuang lo niin an sawi a. Hemi avang hian anmahni leh lirthei himna atan tlan loh hi an titlu ta niin an sawi a ni.

<><><>

## FUEL PANIC BUYING

Food, Civil Supplies & Consumer Affairs department chuan inchuh buai lo leh mahni mamawh tawh theuh chauh tuialhthei lei turin mipui an ngen.

Supply department hian thuchhuah siamin Mizoramah Petrol, Diesel leh LPG te hi mumal takin a rawn thleng lût reng tih an sawi a. Fur ruahtui tam avanga kawngte'n duh thu a sam loh avangin kalkawngah a rawn phurtu motor-te an rawn thang rei deuh thin a. Chuti chung chuan Mizorama rawn phurh luh leh a thlengte chu a pangngai reng a ni, an ti.

Mipuite'n mahni hmasiala mamawh zat ai a tam petrol leh diesel-te an chhekkhawl thin avangin mipui tam zawk tan harsatna an siam thin tih sawiin tul lovah petrol changin Petrol pump-ah inchuh luai luaite a thlen phah a ni an ti. Food, Civil Supplies & Consumer Affairs Department chuan Petrol, Diesel leh LPG te inchuh buai a awm loh na'n mipuite mahni mamawh ang chin chauh la turin a ngen a ni.

<><><>

## PRESBYTERY

Mizoram Synod hnuaia Inkhawmpui lian ber dawttu Presbytery Inkhawmpui, Ningani atanga hman tanah nimin atanga rorel tan chu vawiinah chhonzawm a ni.

Presbytery hi 47 a awm chungin tunah hian Presbytery 41-ah inkhawmpui hi kalpui mek a ni a. Inkhawmpui tan ni, Ningani khan Nomination Committee, Finance Committee leh Sub - Pastoral Committee an thu a. Kohhran Upa thlan tharte Exam buatsaih a nih bakah zan inkhawmah Palai lawmna leh Pastor Bial Report ngaihthlak a ni. Zirtawpni leh Inrinni-ah Rorel Inkhawm a awm a. Presbytery thenkhat chu Inrinni chauha Rorel an awm bawk a, zan lamah vantlang Pathian biak Inkhawm buatsaih a ni. Naktuk Pathianni chawhma inkhawmah Upa Nemngheh Inkhawm hun hman a ni ang a, chawhnu-ah Lalpa Zanriah Sakramen leh Upa thite sunna inkhawm a awm ang a, zanah Presbytery Moderator kalchhuakte'n Valedictory Sermon an sawi ang.

Synod Moderator Rev. R. Vanlalnghaka chuan Chhimchhak Presbytery inkhawmpui a hmanpui a, Synod Secretary (Sr.) Rev. P.B. Mankima'n Aizawl West-I Presbytery hmanpui-in Synod Secretary (Jr.) Upa Vanlalsawma Siakeng chuan Aizawl Central Presbytery a hmanpui bawk. Finance Officer Rev. P.C. Pachhunga'n Serlui Presbytery a hmanpui a, Statistician Rev. H. Laltlanthanga'n Hmarthlang Presbytery inkhawmpui a hmanpui. Sr. Executive Secretary Rev. C. Zoramawia'n Khawthlang Presbytery, Executive Secretary Rev. V.L. Luaia Hranleh-in Teirei Presbytery leh Executive Secretary Rev. Dr. K. Lallawmzuala'n Chhimphei Presbytery inkhawmpui te an hmanpui bawk a ni.

Nimin khan Serchhip Kawnpui Kohhran Biak In-a Chhimchhak Presbytery moderator Rev Lalremruata kaihhruaia rorel thu pawm zingah- bial leh Presbytery huapin HIV/AIDS dona kawnga tan lak ni se tih a tel a. Kohhran Upa thi vui dan ennawn ni se tih a nih bakah, Presbytery inkhawmpui-ah mual inkhawm leh lenkhawm te neih leh tawh nise tih chu Covid hrileng vanga tih loh mai a nih avangin a hranpa a pawm thar a ngai love an ti thung a ni.

<><><>

## MZP

MZP chuan tunhnaia sorkar department hrang hranga officer pension tawh rawih nawn leh pension tawh mai tur tur ruai nawn tura file kal lai a awn ni a hria-in, hei hi uluk taka chhui chian a, pension tawh rawih nawn a nih loh na'n chak taka hmalak an tum.

Vawiina General Headquarters Executive Committee thutkhawm wavi 636-na-ah MZP chuan Mizoram sawrkar hnuaia hna thawk zingah pension tawh rawih nawn an awm fo thin chu tunhma atangin tha an tih loh thu an sawi fo thin a tih an tarlang a. Pension tawh rawih nawn a nih avanga, bang tura nawr pawh a lo nei zauh zauh tawh thin thu an sawi.

MZP chuan, sawrkar hnathawkte chu an hnathawh hun chhunga thahnem ngai taka thawk turin ngen a. An pension tawh hnuah erawh chuan thalai hna zawng mekte kian tur leh officer pension tawh, thiltih theih fal bik avanga inrawih nawn ang chi a awm loh nan theihtawp chhuahin hma a la dawn a ni tih an sawi a ni.

<><><>

### PM INTERNSHIP SCHEME

Thalai-ten thla 12 chung internship an tih theihna tur, Prime Minister Internship Scheme 2024 chu vawiin tlai dar 5 khan a duh apiang dil theih turin hawn tan a ni a, he scheme hi kum 21 atanga 24 inkar, thalai vbch 1-ten kum 5 lo awm tur chungna India rama company lian 500-a a tak ngeia hnathawh an zir theihna tura ruahman a ni.

Tun thlengin company 193-in mi sing 9 sang 1 vel tan internship tih theihna kawng an hawng tawh a, sorkar kum kal lai 2024-2025 chung hian mi nuai 1 sing 2 sang 5 tan internship tih theih hman beisei a ni. Internship ti duhte tan online portal pminternship.mca.gov.in ah dilna thehluh theih a ni a, intern-te chuan thla 12 chung, thla tin cheng sang 5 an dawn dawn bakah tanpuina cheng sang 6 an dawng thei dawn a, dilna hi vawiin tlai dar 5 atangin tun thla ni 25 thleng theh luh theih a ni.

<><><>

### NEW GOVT.

Haryana sorkar thar chu karleh Ningani khian Panchkula-ah lak luh a ni dawn. Chief Minister hlui, Manohar Lak Khattar-a'n a sawi danin, Prime Minister remtih puina angin Chief Minister leh a council of minister turte Oct. ni 17-ah lak luh an ni ang.

Puan tawh angin, tun hnaia Haryana assembly inthlan neihah khan BJP an chak leh a, seat 90-ah seat 48 la in a zawna tum thum sorkarna an siamna tur a ni a, Cong-in seat 37 la-in BSP nena tang dun, Indian National Lok Dal-in seat 5 an la a, Independent-ten seat 5 an chang bawk. Chief Minister ni lai, Nayab Sing Saini chu Ladwa seat-ah a tling a, Chief Minister hlui, Bhupinder Singh Hooda pawh Garhi Sampla Kiloil bialah thlan tlin a ni.

Hetih lai Haryana ruala assembly inthlan neihna, Jammu & Kashmir-ah, National Conference (NC) kaihhruai tangruai pawl chuan sorkar thar an siam thei tih an sawi a, NC Vice President Omar Abdullah-an nimin khan Lt. Governor, Manoj Sinha hmu-in sorkar an siam theih thu a hrilh a, Cong, Aam Aadmi Party, CPI(M) leh Independent MLA-ten an thlawpna lehkha a theh lut a ni.

<><><>